

Visoki predstavnik poduzeo mjere kako bi se izbjeglo stvaranje vakuma u obavještajnom sektoru

Visoki predstavnik Paddy Ashdown danas je donio Odluku kojom se odgada rok za uspostavu Obavještajno-sigurnosne agencije BiH do 1. juna 2004. godine. Visoki predstavnik je ove mјere poduzeo na zahtjev ambasadora Kalmana Kocsisa, predsjedavajućeg Stručne komisije za reformu obavještajnog sektora koja je izradila nacrt Zakona o Obavještajno-sigurnosnoj agenciji BiH, kako bi se izbjeglo stvaranje vakuma kada se radi o očuvanju adekvatne kontrole nad obavještajno-sigurnosnim sektorom.

U pismu koje je uputio premjeru Terziću, predsjedavajućem Komisije za sigurnosno-obavještajne poslove pri Parlamentarnoj skupštini BiH Tomislavu Limovu i visokom predstavniku, ambasador Kocsis je istakao da je "imenovanje generalnog direktora, zamjenika generalnog direktora i generalnog inspektora preduslov za integraciju FOSS-a i OBS-a u Obavještajno-sigurnosnu agenciju. Velika odgovornost je u njihovim rukama. Nažalost, uprkos činjenici da su sve strane uložile velike napore, čini se da je došlo do odgode u procesu imenovanja zvaničnika na ove funkcije. Takav razvoj događaja stvara problem. Bez nove uprave Agencije, stvorit će se situacija u kojoj niko neće biti zadužen za obavještajno-sigurnosni sektor".

Bez ove tehničke izmjene, niko u Vijeću ministara ne bi u operativnom smislu bio odgovoran za aktivnosti u obavještajno-sigurnosnom sektoru. "Takav vakuum bi mogao ugroziti napore koje su bosanskohercegovačke vlasti do danas uložile kako bi

unaprijedile izuzetno težak proces reformi u obavještajnom sektoru”, naglasio je visoki predstavnik.

Visoki predstavnik također je odao priznanje Parlamentarnoj skupštini za uspjeh u brzom uspostavljanju Komisije za sigurnosno-obavještajne poslove i imenovanje njenog predsjedavajućeg. Također je pozdravio odluku Vijeća ministara o formiranju Obavještajno-sigurnosne savjetodavne službe, kojom će se omogućiti izvršna kontrola nad obavještajnim sektorom kada Obavještajno-sigurnosna agencija BiH konačno bude uspostavljena 1. juna 2004. godine. “Članovi Parlamenta su pokazali da su uvidjeli da moraju brzo djelovati”, izjavio je visoki predstavnik.